

曾文正公奏稿

文正公奏稿

卷之二十三目錄

湖口防軍勝仗摺

同治二年七月二十七日

近日軍情片

覆陳籌援臨淮摺

八月十二日

金陵軍攻克上方橋江東橋石壘摺

八月二十七日

近日軍情並調金國琛回皖片

青陽援師大捷解圍摺

九月十二日

近日軍情片

京倉需米照部議妥籌摺

九月二十二日

近日軍情片

甯國涇縣防軍勝仗摺

九月二十七日

金陵軍壘克入隘并復秣陵關摺

十月十二日

古隆賢率眾投誠收復三縣摺

全日

近日軍情片

克復水陽東垣等隘高溝等四縣摺

十月二十七日

欽奉 諭旨覆陳四條摺

十二月十二日

恭謝 天恩並陳近日軍情摺

十二月二十七日

湖口防軍勝仗摺

同治二年七月二十七日

奏爲湖口各軍疊挫賊鋒遂毀文橋堅巢羣賊悉遁恭摺彙報
仰祈

聖鑒事竊自江忠義李榕督軍進次湖口擊賊屢勝臣於六月
二十七暨七月十二等日節次具陳大概在案先是僞堵王黃
文金糾合諸賊酋於二月由皖入江分擾鄱陽浮梁祁門都昌
境內屢爲劉典段起席寶田韓進春等軍所扼不得深入江西
乃折而西竄趨重湖口分爲三路上路曰文橋中路曰梧桐嶺
下路曰太平關袤延三十餘里而文橋賊勢最重凡堅壘七座
黃逆親踞其中浙江鹽運使李榕自彭澤項家山一捷後聞湖

邑告急於五月十四日移營湖口之三里街越十數日江忠義亦率所部自九江東渡會師於馬影橋六月初九日雕剿殷家山涂家嶺之賊展旗一進不戰而卻江忠義旋紮堅山以偪之十七日賊由文橋出大股三萬餘眾分道來犯江忠義留兵守定老營隨令徐士巍徐生德王順慶等直前迎敵而以李祥松劉光文林志金等爲左翼江忠寬黃仁遺權光燦等爲右翼仍親督陳鳴志江忠華馬步各營從後繼進戰不兩時李榕部下鄭陽和楊春華兩營前來會剿突出堅山之右列陣裏賊李榕以賊方眾悍勢恐不敵飛騎止之而鄭陽和已衝過曹均橋與賊戰於田壠一馬中槍而逸羣馬卻後幾亂步隊李榕抽刀壓

定陣腳江忠義麾軍驅殺至數里外賊乃回戈轉鬪且卻目前
哨弁黃忠勝李光明李士青江忠修鄧在仁黃守和等縱橫盪
擊各負重創李榕部將陳由立大呼陷陣殲悍賊百餘人盡力
窮追深入敵境誤爲伏賊所鈔急引軍躍出重圍士卒已傷亡
九十五人十九日賊以大枝匿於鰲山張天社一帶乃以小枝
薄營誘戰江忠義戒諭將士堅壁不動賊始計沮悉衆來攻排
列五六層猛撲十數次官軍但以槍礮外轟遇者輒殲忽有一
酋指麾衆賊無敢反顧者江忠義詢之降卒知爲逆渠黃文
金俟其撲近花籬聚羣槍同時並發應聲而仆賊遽譁亂爭昇
以行餘亦相率竄走據生擒賊供逆酋黃老虎實受重傷而奔

此六月十七十九等日賊犯堅山各營合戰獲勝之情形也自黃逆負創後賊爲氣奪悉屯文橋壘後匿不復出江忠義李榕周應形勢共籌進取必以一營斷梧桐嶺來賊二三營防文橋壘賊而以全力注陳兵馬地方庶有下手之處二十八日江忠義率精捷九營進陳兵馬中左兩路李榕率鈞字五營出左路之左進水車港鄭陽和策馬當先手刃瞻望二賊楊春華麾隊繼之轉戰而入江忠義遙望樹林陰翳中賊旗隱約卽督中軍親兵鼓行疾進兩鋒相交火器燃發槍子雨飛何明立鄭長來聯騎齊驅將賊蹙逼出林直薄陳兵馬賊館賊復增黨決戰陳由立正在傍山搜剿見鄭陽和楊春華從左路橫躍入陣急催

部卒併赴前敵與江忠寬陳正珀猛進猛擊賊乃大潰但以另
股繞出縱焚邨舍徹夜擾我次日曰李榕率偏師突出擊之由太
平關一路打散刈稻之賊數百小有擒斬江忠義分軍爲二一
出花尖山一出毛家店所向辟易張寶鑑橫槩直入殪騎於陣
旋以中賊三矛逾時殞命各營奮力馳護數路並進林志金江
忠倬亦自花尖山移軍來助賊不能支敗過梧桐嶺惛伏不動
者數日適會劉典席寶田等有南路青山橋之捷賊於是有退
志矣七月初三夜江忠義在堅山營中俯瞰文橋七壘火光熒
熒若隱若現度賊將遁約李榕部隊於五更時出營會剿仍先
遣勇士潛至壘下鳴號鼓以驚賊賊不虞官軍之猝至惶遽不

知所爲各勇乘勢踰濠蟻附而上比江忠義李榕全軍踵至眾壘已平遺棄米穀相望於道於是各整隊伍裹四日糧越黃沙嶺馳斬尾股足無停趾直出建德所屬之羅家畝上下房等處殺賊二千有奇積尸塞路始於初八日整旅而還此六月二十八九等日擊賊疊勝七月初三夜攻奪文橋及連日追剿之情形也臣查皖南各賊圖竄江西邊境不得逞於饒州景鎮遂欲佔踞湖口徐擾腹地經江忠義李榕等擊傷悍目攻毀老巢使賊不敢駐足江境次第肅清實屬有裨大局其應獎應卹人員除江忠義一軍應由沈葆楨奏請外李榕一軍可否容臣查明酌獎之處出自

聖恩至花翎守備張儀卿楊友和藍翎守備劉喜祿王俊傑沈克明藍翎千總汪春旺金家見張先亮藍翎把總夏楚寅譚正與韓得勝馮玉峯外委楊興隆等十三員弁均係力戰陣亡應請

敕部各照本職從優議卹以慰忠魂所有湖口防軍屢獲勝仗各賊全遁緣由謹繕摺由驛五百里馳陳伏乞

皇太后

皇上聖鑒訓示謹

奏

近日軍情片

同治二年七月二十七日

再近日軍情曾國荃一軍派劉連捷駐營下關自六月二十二至七月初六該逆猛撲數晝夜洋鎗礮礮多而且悍經劉連捷竭力擊退曾國荃因北路喫緊力攻南路以掣賊勢七月初八九日大戰獲勝攻毀印子山賊壘調蕭慶衍由江浦南渡分守要地鮑超病體尙未全愈其將卒雖亦多病然較去歲則已少矣蕪湖守將吳坤修於十七日約會水師迎擊於雙斗門破其二壘乘勝追至水陽金柱關蕪湖兩防均可鬆勁甯國南陵涇縣灣沚清弋江各防近亦均無戰事惟湖口肅清之後江西羣賊悉數東趨行走剽疾二十日已繞過池州進撲青陽縣城守

將朱品隆督軍固守二十一二等日賊又以全力來撲四面合圍環城而營朱品隆所部七營營官病者四人其胞弟甫經病故朱品隆亦抱病甚重昇疾登陴未知能否堅守待援現在劉典一軍回駐徽州江忠義李榕席寶田三軍臣檄令作爲潯饒徽甯池五郡游擊之師李榕已抵東流江忠義席寶田亦以病多夫少尙未拔營入皖但願青陽保守無恙各軍陸續前進則皖南大局不至決裂苗黨之據壽者踰伏未動蔣凝學毛有銘周寬世成大吉所部各駐要區防守尙穩蒙城解圍以後賊聚懷遠普承堯張得勝等攻懷之師已被該逆截斷後路糧運梗塞臣所派赴援臨淮之何紹彩陸師二千人王吉丁泗濱舢板

八十號已據先後到防十三日水陸並進水師攻奪宋家灘礮
划數十隻惜河洲一壘未破前敵糧運仍爲賊阻其留守臨淮
者兵力過單別無可濟之師殊少自全之策北顧淮甸殷憂曷
已除各路戰狀分案續奏外合先附陳梗概伏乞

皇太后

皇上聖鑒謹

奏

覆陳籌援臨淮摺 同治二年八月十二日

奏爲欽奉疊次

諭旨恭摺覆陳仰祈

聖鑒事竊臣承准議政王軍機大臣字寄同治二年七月初十

日奉

上諭昨因彭玉麟赴援江西諭令曾國藩迅催楊岳斌督率水師駛赴臨淮藉資援救此時苗逆勢極猖獗援兵早到一日庶得早救一日之倒懸仍著曾國藩遵旨嚴催毋稍遲玩唐訓方仍就現有兵力妥籌守禦以待援師並飛催蔣凝學周寬世毛有銘等軍迅速進紮溜子口等處約期會剿不可稍有鬆勁等

因欽此又奉七月二十四日

上諭臨淮地方關係皖北全局豈容稍有疎虞現在危急情形迥異尋常非有陸路援軍速行馳救大局將不堪設想曾國藩所部各營雖不敷分布亦當於無可籌撥之中勉力抽派一軍星馳援應等因欽此又奉七月三十日

上諭李世忠既欲出力報效與其駐勇五河專俟賊至何如督飭所部由五河星馳前進以拯臨淮之急并著曾國藩卽行札調該提督迅速進兵毋稍遲誤曾國藩接奉此旨後察看李世忠近日情形如果私讐公憤發於至誠卽將此旨摘錄傳諭並須坦白相待使之不疑令其知感知愧樂爲我用李世忠是否

司資其力此次可否摘錄傳諭並著曾國藩酌量辦理隨時覆奏等因欽此伏查濱淮之要區有五北曰潁上曰懷遠南曰壽州曰鳳陽曰臨淮皆緊傍淮水者也距淮稍遠之要區有四北則濱潁河者曰潁郡濱渦河者曰蒙城南則濱淝河者曰六安濱史河者曰固始皆匯於淮水者也自潁上懷遠壽州悉淪於賊九處已失其三目下唐訓方所置守者爲臨淮爲蒙城爲鳳陽三處臣所置守者爲六安爲潁州爲固始三處情形雖稍分緩急而皆苗逆必爭之地臣前派何紹彩陸師二千人及彭玉麟楊岳斌所撥舢板八十號先後抵淮亦嘗戰勝一次因苗逆徒黨日眾夾淮而軍懷遠蚌埠糧路已斷七月二十二日唐訓

方將各營撤退卽長淮衛小蚌埠一帶亦被苗逆佔據臨淮一

軍危如累卵

臣

本思續撥援兵挽救全局況又疊奉

諭旨責無旁貸無如近淮諸軍如周寬世蔣凝學毛有銘成大
吉等皆扼守最要之地不能抽動周寬世所部分守六安迎河
集二處尙嫌單薄頃又調桐城一營併紮迎河矣蔣凝學所部
分守潁郡霍邱三劉集三處七月十七日攻破黃梁集西南二
圩十八九日疊平數圩該處在溜子口之南苗黨倘貫金嘯聚
其間蔣凝學派隊出劉家台湖口焚其米船盡毀羣圩遂於八
月初一日襲破倘逆老巢嚴防河路爲將來進兵溜子口之計
毛有銘所部駐守老廟集七月十七日攻破陶家三圩旋又分

紫板橋集凡壽南六北之良圩賴該軍以自保成大吉所部分
駐固始三河尖近以爲潁郡之聲援遠以爲鄂省之屏蔽而潘
塏等圩首鼠觀望亦須有該軍維繫其閒庶不至堅其公然從
苗之志凡此皆近淮諸軍難以調動之情形也至大江南岸諸
軍自江西肅清後黃文金等股七僞王圍撲青陽守將朱品隆
病勢日篤不能登陴將士病者過半苦守兩旬兵單糧絕岌岌
可危李榕之由水路赴援者甫抵離城十八里之銅埠江忠義
席寶田之由陸路赴援者現尚未至池州青陽之能否保全殊
無把握縱青邑倖保無恙而賊意在圍魏救趙將徧擾皖南最
要之區以掣金陵官軍之勢凡甯國蕪湖南陵涇縣灣沚青弋

江必將處處喫緊臣以金陵各軍新破上方橋河西二壘城賊水運已斷不得已檄令鮑超引軍西上以剿由江回皖之賊以救甯國蕪湖之急方今滬軍極盛江陰新克已將蘇浙之賊截爲數段正在得手之際本宜加功於金陵收效於蘇郡臣分金陵之兵以救皖南已屬失算若再遠救淮上所失尤大此江南諸軍不能赴淮之情形也

諭旨命臣剗調李世忠迅速進兵毋稍遲誤並垂詢是否可資其力一節李世忠中心感愧與苗爲讐是其可信之端而將弁驕恣士卒攜貳又其不可恃之端該部所駐江北州縣惟滁州五河兩城稍有關繫數年之儲蓄各營之精銳畢萃於斯論守

局則自顧身家或有堅忍之力論戰陣則向無紀律難操必勝之權果其該提督迫於公義私憤併力勦苗自未便阻其敵愾之心致啟其猜疑之漸若必調勦以資其力則臣能保該提督之無他不能必該部眾之用命萬一軍心不固前敵挫失恐五河後路又蹈二浦覆轍欲拯臨淮之急轉貽全局之憂此又臣所不能不過慮者也竊計臨淮各營何紹彩歐陽勝美等之陸師丁泗濱王吉等之水軍尙無損折普承堯張得勝挫退以後已逾半月當可收集補綴次第成軍臣處解銀二萬及子藥槍礮以資整頓倘得陳國瑞援軍迅達臨淮或者勉力支持保此危疆臣俟皖南軍事稍鬆仍當另籌一旅馳往會勦斷不敢稍

存膜視上煩

宸廑所有疊奉

諭旨緣由謹繕摺由驛五百里覆奏伏乞

皇太后

皇上聖鑒訓示謹

奏

金陵軍攻克上方橋江東橋石壘摺

同治二年八月二十七日

奏爲金陵陸師擊賊屢勝將上方橋江東橋諸堅壘一律毀平

恭摺馳陳仰祈

聖鑒事竊本年七月初間官軍在金陵城外堵剿獲勝并克印子山賊巢業經浙江撫臣曾國荃會報戰狀在案自昔年賊據金陵迨曾楊秀清布置最密城外如九浚洲七里洲中關下關雨花台紫金山秣陵關江東橋上方橋等處類皆築壘如城掘濠如江爲堅不可拔之基曾國荃一軍今年攻克數處聲威頗震又以江東橋爲西南隅要隘飭陳湜督軍圖之上方橋爲東南隅糧路飭蕭慶衍進兵圖之七月二十日蕭慶衍率七營出

印子山之東偏賊壘而下寨城賊與七甕橋之賊竭力來爭曾國荃令蕭孚泗張詩日李臣典等分隊堵禦俾蕭慶衍牆壕逾時而成二十二派李祥和凌有和等滾營而進更紮蕭慶衍新壘之前賊擁眾猛撲我軍力擊卻之壘成後昇巨礮晝夜環轟賊爲堅壁不出者數日曾國荃於二十九日潛遣熊登武胡松江陳壽武等繞過上方橋五里許搶築六小營以截賊後賊懼糧路阻絕乃糾數大枝悉銳來撲蕭孚泗李臣典等麾軍迎戰小有撿斬伍維壽周日昇復以騎隊從右路遠來包鈔賊始駭潰合軍追及秣陵關破十餘卡盡奪河下賊船而河西之接濟斷矣蕭慶衍知壘賊計窮傳令郭鵬程蕭恆書等營會合李祥和

和所部於夜半時各負秫桿擁至濠邊競拔地鍼大呼猛進比賊驚覺前鋒軍士半已躍入壘中曙色朦朧各軍抽刃環追悉殲羣醜卒有說者此七月三十日攻毀上方橋河西堅壘之情形也其江東橋一路石壘高峙環繞木城外隔水二道賊以有險可倚負固拒守陳湜率吉後兩營及平字盛字恭字三營設法進攻數月不下阮明德等力戰死之陳湜積憤填臆乃置攻具建浮橋將制死於敵人而諸將未之喻也八月十一夜風霾蔽月咫尺莫辨陳湜選銳卒數百涉流而渡潛匿壘下特製絕大噴筒望空飛擲賊方驚眩不已陳必友朱載武等已衝過浮橋徑拔花籬晏恭山劉定發從右路鈔出壘後吳隆海陳汝俊

從左路鈔至旱西門陳湜旋督大隊繼進賊恃牆堅礮利連環
轟擊我軍所挾藥筒爲該逆素所未見焚及木城朱載武膝壽
春引死士肉薄齊登先登者負傷輒蹶陳湜率吳隆海陳汝俊
抽刀壓陣士卒不敢卻顧有緣梯而上者有向礮眼中蛇行而
入者賊皆惶遽失措奪路爭竄次日昧爽遂拔石壘並將眾壘
一鼓下之而城中出援之賊適遇蕭孚泗張詩曰黃潤昌羅逢
元趙三元各營隊伍自寶拱橋突出搏鬪移時受創而遁此八
月十二日攻克江東橋各壘之情形也臣查上方橋江東橋均
占形勢經諸將士悉力攻克俟上游軍事稍鬆大集新舊各軍
徐圖合圍較有把握此次出力人員可否附於克復雨花台案

內酌請獎敘之處出自

聖恩陣亡員弁俟彙案開單請卹所有金陵各軍攻破上方橋
江東橋兩隘緣由謹會同大學士湖廣督臣官文江蘇撫臣李
鴻章浙江撫臣曾國荃由驛五百里具奏伏乞

皇太后

皇上聖鑒訓示謹

奏

近日軍情並調金國琛回皖片

同治二年八月二十七日

再近日軍情青陽一城黃文金等僞王圍攻已歷一月零六日
文報不通米糧久斷八月十二日李榕部將鄭陽和等至距城
十里之袁橋紮營旋被該逆攻陷喻吉三率三營繼進十八日
紮營徐家村二十一日攻破袁橋賊壘小有斬擒二十二日江
忠義席寶田兩軍繼進將合謀力戰以解重圍得朱品隆密稟
城中草根樹皮採食俱盡能否忍飢爲數日之守殊不可知青
陽迤北爲銅陵縣突有藍逆另股竄入彭玉麟派在防水師一
戰卻之其迤東爲涇縣賊股分擾劉松山自甯郡督隊至涇會
同守將易開俊剿賊於金村李村鳳村茂林章家渡等處屢獲

大勝又有花旗廣匪窺犯甯國郡城劉松山引軍回郡力戰卻之目下皖南羣盜如毛幾與去冬相似幸劉典王文瑞王沐等議由徽州分道出嶺進規石埭太平二縣而上所謂鮑超一軍亦由金陵上援先赴蕪湖甯國或可力保皖南支持全局至壽州苗逆之黨自前月破我懷遠圍師後復攻蒙城凶燄益熾八月十二夜渦河南北各營全數潰退撤至小澗集守城者僅李南華等練勇千餘人斷難倖全臨淮一路有都興阿派二千人赴援

諭旨又飭富明阿帶兵繼進李世忠亦親督五千人來會夾淮分屯尙足自固苗逆若不得逞於臨淮則上游六安潁州固始

三河尖處處喫緊周寬世成大吉蔣凝學毛有銘等各守一方
勢鈞力敵不相統屬臣曰夜變灼深恐心志不齊調度舛錯貽
誤大局查前任湖北安襄鄖荆道降補同知金國琛與成大吉
蔣凝學毛有銘等同出李續宜部下周寬世亦出自李續賓部
下該數軍分駐皖豫之交須有人維繫其閒庶得聯爲一氣李
續宜病勢日深暫難東下臣擬親赴六安察看一切又因皖南
事急不敢遠離江濱所可調護湘營籌剿苗逆者惟金國琛能
勝此任該員疊奉

諭旨飭赴河南軍營因傷疾舉發羈留湖南尙未成行臣思皖
豫邊境同以苗逆爲鉅患潁州雖屬安徽疆土而實爲河南所

必爭之地固始三河尖雖屬河南疆土而實爲安徽所必爭之地并爲湖北所必守之地形勢雖判爲三省事權宜歸於一線現聞金國琛舊疾漸愈赴豫則須另募新軍難求速效赴皖則可通四軍之氣而固兩省之防惟有仰懇

天恩准將金國琛一員改赴皖北責令綜理周寬世等四軍營務仍往來固始三河尖等處會辦皖豫交界勦苗事宜實於兩省均有裨益除各路戰狀分案詳奏外所有軍情梗概及調金國琛會辦皖豫交界勦苗事宜理合附片陳請伏乞

聖鑒訓示謹

奏

青陽援師大捷解圍摺

同治二年九月十二日

奏爲青陽苦守三十八日援師大捷立解城圍恭摺馳報仰祈
聖鑒事竊逆匪由江入皖圍撲青陽官軍水陸進援先挫後勝
臣節次附陳大概在案初僞堵王祐王等七悍酋擁十數萬眾
在都昌湖口彭澤一帶戰敗而東遂略池州直薄青陽城下七
月二十日守將朱品隆派隊迎敵挫賊前鋒斬忠盼朝將洪逆
以徇俄而賊分兩大枝一由廟前而來偪我西南兩門一由茅
坦而來偪我東北兩門蟻聚蜂屯爭營巢窟不數日間近城半
里環築六十六壘又數里更築七十餘壘濱河設有木城河岸
堅卡林立悍黨守之自是城中糧運斷絕文報亦阻矣二十三

四日我軍分道擊賊毀東門三卡西門二壘二十六七日又在北門毀賊數卡然皆隨毀隨修不經宿而立就八月初旬以後無日不戰戰或小勝而朱品隆病莫能興部將亦多嬰疾病漸不可支時江忠義席寶田兩軍尙在東流李榕先率所部於初六日由水路駛抵距城十八里之桐埠安營築埂成軍以濟初十日李榕揚隊至洪山口該處左水右山路狹如綫馬不得上乃令左右兩營覓民划分載陸勇約柳壽田水軍乘溪水未落夜襲袁橋賊卡五更後李榕駕小舟從後策應少頃礮划銜尾而上袁橋卡破盡殲據卡之賊遂於十二日派鄭陽和陳由立各將三百人進紮袁橋守城將士遙望援兵初進亦出隊應之

奮擊西北兩門卡壘冀通內外之氣詎鄭陽和牆壕甫成被賊撲陷水師柳壽田亦挫敗而歸陳由立以背水孤營被賊層層圍裹封壁不動自未刻至四更苦戰固守逮賊之環攻少懈始得振臂一呼引軍突出自是外援絕而城中飢憊益甚矣幸臣所調之喻吉三陸師彭玉麟所派之喻俊明水師已達茅坦十八日進紮徐家村城中始知援兵營壘已定眾心稍安江忠義席寶田亦先後踵至駐軍於石壘鋪二十一日喻吉三等有袁橋之捷越三日席寶田更進五溪橋踰嶺破卡賊遽驚潰堵逆黃文金自刃數賊轉鬪而前席寶田撥隊鈔入卡後黃文金從亂軍中逸去我軍併進伍家村土地壇屠戮無算而軍勢爲之

一振此七月二十至八月二十四等日賊圍青陽苦籌戰守之
情形也疊據朱品隆遺死士易服而出蠟書隱語言軍中米糧
既盡食及牛馬牛馬既盡食及草根樹皮閱者爲之隕涕適彭
玉麟來自池州周歷形勢見董家村路口對峙二卡右枕高岡
左臨溪隴卡後地稍平行結壘者四將以拒我援軍乃與諸軍
熟商議定江忠義精捷八營出董家村山後爲攻卡正兵喻吉
三護軍三營出陳家村後包過田隴爲攻卡鈔襲之兵李榕先
派鈞前副右兩營守定糴子店烏魚潭後路而自率鈞中左右
三營徑渡西岸由獅子山頂壓下會於董家村口爲護軍接應
之兵並以喻俊明柳壽田水師分進夾山洪山兩口專攻袁橋

陳家村大小羅村各賊壘爲陸師依護之兵二十七日五更薙
食水陸大舉江忠義親督黃仁遺江忠寬徐生德鄭長希等行
近董家村從山後榛莽中揮隊緣巖而上賊在巖腰燃發洋槍
先登者中槍輒蹶黃仁遺率王高來身先禦之江忠寬自右路
鈔上巖腰遇賊卽砍無一脫者徐生德乘勢躍過濠溝撲卡直
入而護軍旗幟出自田隴喻吉三涉水而前水深及腹盡焚路
口二卡遂合黃仁遺鄭長希等擊退援賊移軍轉攻賊壘相持
逾時堵逆突糾大股數萬環布壘外圖鈔我後我軍少卻江忠
義壓定陣腳誓不返顧各營哨衝入賊叢縱橫盪決哨長鄧新
維身中數矛猶復裹創力戰喻吉三正在麾軍助陣乃賊隊忽

亂敗若湧潮中路堅壘既破左路二壘俱下李榕適由獅子山
繞至村口賊眾惶駭奔北聲若頽牆維時水師亦自袁橋棄舟
登陸攻破陳家村逆壘席寶田在五溪橋相距稍遠疾馳來會
行次中途遙望西北附郭一帶烟燄蔽天知守城之軍自內擊
出卽約諸援軍一鼓猛進悉掃賊巢直抵城根而青陽之圍立
解計平一百三十餘壘殲擒實逾萬人餘賊遁歸石埭一路此
八月二十七日會師青陽城下力解重圍之情形也臣查青陽
一城陷賊十年經鮑超用兵數月始得攻克此次黃文金各賊
股以全力爭此要區意將大擾皖南掣我金陵兵勢幸託
聖主威福諸將士忍飢扶病內守外援歷三十八日之久平能

拔出重險力保垂陷危城實屬有裨大局在事尤爲出力人員應先另繕清單仰懇

恩施以昭激勸其餘出力員弁可否容臣查明專案奏獎之處出自

聖裁至陣亡花翎都司許和山藍翎千總李席珍藍翎把總余才勝李華崑周玉祥楊元成劉受一把總張修胡承初謝見章鍾登高藍翎外委李得勝周新喜賀宗修張良才等十五員弁應請

敕部從優議卹已革參將李殿華於湖口堅山之戰身先陷陣最稱得力此次力戰捐軀尤爲憫惜並請開復原官照副將陣

亡例從優

賜卹以慰忠魂所有青陽援師大捷共解城圍緣由謹繕摺由
驛六百里馳奏伏乞

皇太后

皇上聖鑒訓示謹

奏

近日軍情片

同治二年九月十二日

再近日軍情臨淮一路穩守如常陳國瑞於八月二十四日至小澗集會合英翰所部四日內疊破賊圩蒙城文報漸通重圍可期迅解唐訓方亦派何紹彩再進蚌埠一路以掣賊勢前此蔣凝學攻克黃梁集逆首倘貫金適赴下蔡乞援致令漏網近聞該逆在蒙城勾結苗黨萬人至壽州分竄余家集三覺寺等處意在擄掠或不至遽謀深入大江南岸青陽解圍後太平石埭旌德甯國四縣尙爲賊踞劉典王文瑞王沐等軍正議由徽州出嶺會剿適因太平之賊竄入簪嶺延擾許村石門一帶雖經劉典會商唐義訓擊退而浙江富陽新復左宗棠札調劉典

回浙該臬司去後徽州防兵單弱勢難再圖嶺外現今江忠義
席寶田李榕朱品隆喻吉三分兵兩路進攻石埭太平等縣惟
該數軍轉戰數月尙多嬰疾未愈朱品隆亦因大病過久請假
回籍調理鮑超一軍已至南陵擬令搜剿新河莊水陽金寶圩
之賊由建平直達東壩其甯國守將劉松山涇縣守將易開俊
自八月初九十一日大捷後十七日賊圍甯國郡城劉松山力
戰卻之二十二日賊至廟埠又卻之而易開俊亦於八月二十
四九月初三日先後破賊於涇縣之茶坑平垣等處但求將皖
南各股悉數驅除東接浙師之氣北絕金陵之援則事機漸順
矣除另摺詳報戰狀外合先附陳大概伏乞

皇太后

皇上聖鑒謹

奏

京倉需米照部議妥籌摺

同治二年九月二十二日

奏爲京倉需米甚殷遵照部議悉心妥籌恭摺覆奏仰祈

聖鑒事竊臣接准戶部咨開三口通商大臣崇厚籌備京倉一

摺經該部議奏請

旨飭下臣與官文沈葆楨惲世臨嚴樹森等會同籌畫將鹽課漕折兩項實能籌撥若干妥籌辦理等因於同治二年七月初一日奉

旨依議欽此並鈔錄原奏咨會到臣查咸豐十年以來蘇浙淪陷南漕運京爲數寥寥上年全漕竟未興辦僅賴李鴻章勸辦商捐米九萬石於夏閒次第解京在上海經營甚苦而在

天庾則裨益甚微本年東南應徵之漕自應設法多解本色上供

京師至急之需然江蘇淮揚通海之米已由漕臣吳棠奏准仍徵折色撥充揚州軍餉湖北之米已由撫臣嚴樹森奏准萬難改征本色江西之米亦由撫臣沈葆楨具奏仍難改征本色此三臣皆素抱公忠絕非不顧京倉根本之人其所以難於解米者蓋爲時勢所迫成例所拘殆非一二言所能罄目下欲運江楚之米入京卽百餘年之成憲與近數年之事例均不能不大爲變通

臣請爲

皇上縷晰陳之向來三江兩湖皆有官製漕船分幫編號水次

受兌各有定所今則漕船盡壞將欲全數修復需銀約近三千萬兩旣難籌此巨款又值黃河北徙運道久淤之後又值泰西就撫海道暢行之時由江浙閩廣以達天津出入洋面如履戶庭揆之天時人事自須全廢河運概行海運而兩湖江西安徽向未辦過海運成案江湖之遠雇船之費若非由部臣先爲定議疆臣頗難措手自前明以屯田養衛軍以衛丁運糧船我朝因之改爲旗丁行之旣久屯戶不能耕田而鬻與平民動倚衛官以抗糧衛軍不能使船而另募水勇動倚旗丁以滋事名實相舛旣已不勝其弊矣而旗丁每次領運需索幫費視州縣若魚肉閭壻之委員通州之倉書又視旗丁若魚肉臣歷觀道

光年閒諸臣之奏疏

宣宗之諭旨言及州縣浮收旗丁幫費未嘗不深恨次骨終以積重難返莫可如何今則局勢大變日月重新漕船既可全廢旗丁亦可全裁頃者兵部議覆嚴樹森裁兵一案飭_臣等酌量辦理郭嵩燾在糧道任內因之詳請盡裁屯兵以屯田改隸州縣以衛官改隸綠營其說甚爲詳明_臣以戎事倥傯尚未據以入奏茲既議廢漕艘自應并革衛軍_臣所謂百年成憲不能不大爲變通者此也道光二十七年王大臣戶部會議以京師之現銀太少南中之浮收太重請將南漕改征折色以實部庫而蘇民困旋經督_臣李星沅奏駁不行

文宗登極撫臣傅繩勛痛陳浮收幫費之弊民不聊生又請改徵折色旋經部科議駁不行逮咸豐三年粵匪竄陷金陵長江梗塞不得已改收折色定爲每石一兩三錢當時銀價每兩換錢二千餘文米價每石不過一千餘文故一兩三錢民猶病其重也今則情形迥異價值懸殊銀價每兩不過換錢千三百餘文米價雖各省不同然大致相類李鴻章嚴樹森奏稱四兩以外係就夏閒荒歉言之吳棠沈葆楨奏稱三兩上下係就秋閒收穫言之臣處目下所買之米其價亦近三兩若如崇厚原奏合米價運腳僅及二兩則近年絕無此事米價既費三兩加以由內河而出江由江而海而津船價耗米等費計亦不下二兩

是南省解到天津之米約計需銀四兩九錢而南省所收民間之漕部價僅算一兩三錢若解米十萬石卽有三十六萬金無著之款部臣不准銷疆臣不能賠此中窒礙情形實乏彌縫之術卽以江西而論辛酉年之漕折臣與毓科出示每石徵錢三千壬戌年之漕折臣與沈葆楨出示每石徵銀一兩九錢以一兩三錢之部價計之則所納並不爲少以目下穀米之市價計之則所納之數斷不能購米一石而船價耗米各費更無所出以臣愚見必求部臣奏請

特旨米價運腳均准據實報銷不拘原定一兩三錢之數庶江楚本屆之漕尙可設法解京臣所謂近年事例不得不大爲變

通者此也兩淮鹽務與漕政本不相涉然崇厚議撥鹽課以購南米亦權宜救時之一策臣忝任鹽院三載有奇而淮鹺未嘗竭力經畫非敢置爲緩圖也沿江上下各軍釐卡至十餘處之多均以鹽釐爲大宗臣若驟議變革則各軍皆向臣處索餉若全不變革則官鹽斷不能逐卡完釐而楚岸引地久爲川私粵私侵佔西岸引地久爲浙私粵私侵佔民間藉此以免淡食鄰省藉此以籌釐餉江路未通豈能禁鄰私之盛行且輪船拖帶流弊百出既可授洋人侵奪鹽利之權又恐啟私梟假託洋商之漸種種窒礙無處著手故吳文錫之呈詞錢寶廉之奏疏雖

奉

諭旨飭辦臣尙因循未及興辦職此之由仰託

皇上威福九洲既克長江一律肅清臣始與郭嵩燾重立新章先辦江西一岸現在規模初定稍遲再行專案具奏大約緩納逐卡之釐金由臣處總收而分送各處禁革餉鹽之名目以商運爲主而輔以官運庶幾收回利權漸循軌轍此又當變通近年之事例而返諸昔年之成憲者也斯二者皆當今之急務而漕糧關係尤重更張尤大相應請

旨飭下王大臣戶部悉心集議據臣愚見復南漕之舊章定海運之全規縱使軍務大順亦須俟諸同治五六年以後目下二三年內祇可作試行之局難遽爲永定之章米石不必徵諸民

閒民折銀而官購米亦可商捐米而官代解亦可米色不必拘
守成例江廣而參用白糧亦可蘇浙而不盡粳米亦可數不必
其如額全解不厭其多三四萬石不嫌其少價不必其盡同此
省與彼省可以參差前批與後批可以增減但求有米到京一
切不爲束縛聽東南各督撫因地制宜從容展布試行一二年
後自然漸講漸精中外皆有把握惟今日之試行卽爲他日之
成案如漕船應否另造屯衛應否速裁沙船應於何處受兌上
游應於何處匯總何條應用厯年海運之例何條應用本年商
捐之例均須由王大臣戶部預爲議定庶幾可暫可久得所遵
循至鹽務係微臣專政目下實無鹽課銀兩可以撥充漕費抱

媿殊深所幸湖南撫臣惲世臨籌畫精詳擬解米十萬石進京除新舊漕折外另籌巨款以作運費將銀兩先解臣處商所以運津之法又奏派迤東道黃冕察看長江剝運事宜黃冕因創爲米鹽互市之議稟請於皖省設互市局招徠湖南商賈運米至皖由皖省設法運滬運津並招淮南商運鹽至皖與楚中米商交易而退此局若成不特湖南漕米可以中途交兌卽江西湖北之漕亦可酌量由皖遞運淮鹽如有起色旣可清軍餉之積欠亦可補京米之不足與崇厚之原奏戶部之議覆均相符合卽與華祝三請提江廣之銀交吳棠買米解京之奏其用意亦復暗合實屬因勢利導兩有裨益除由臣商江楚三省詳議

各行具奏外所有京倉需米遵照部議悉心妥籌緣由恭摺由
驛五百里復奏伏乞

皇太后

皇上聖鑒訓示再郭嵩燾請裁衛兵之詳謹鈔呈
御覽以備發交王大臣戶部一併集議臣卽不另案具陳矣謹
奏

近日軍情片

同治二年九月二十二日

再近日軍情金陵雨花台各營及金柱關蕪湖各防均無戰事
鮑超一軍由蕪湖進攻建平東壩須先剿新河莊水陽金寶圩
之賊日內計當接戰石埭太平之賊窮蹙已久本無固志惜江
忠義席寶田等軍病卒甚多尙未進兵九月初七八等日涇縣
守將易開俊剿賊於晏公塘風坑琴溪橋一帶又獲大勝賊乃
遁往甯國縣境其黃文金各股由青陽迤邐下竄意在併入浙
江左宗棠調劉典旋浙或足以資防剿北岸臨淮六安諸營防
守尙穩惟蒙城糧盡援絕恐難持久又有陳大濤捻股由豫入
鄂竄隨州棗陽應城麻城以達黃州勢將闖入皖境皖北祇

此兵力別無迎擊之師殊爲可慮除甯國涇縣各戰狀另案詳報外合先附陳梗概伏乞

聖鑒謹

奏

甯國涇縣防軍勝仗摺

同治二年九月二十七日

奏爲甯國涇縣防軍疊獲勝仗恭摺馳陳仰祈

聖鑒事竊總兵易開俊劉松山等各統湘勇五營分駐甯郡涇縣屢遏內犯之賊經臣三次奏陳梗概在案本年七月下旬太平逆酋古隆賢石埭逆酋賴文鴻等乘青陽被圍官軍不暇兼顧之時各糾大股蓄意犯涇以古逆一股踞聚茂林潘村等處以賴逆一股踞聚丁家渡章家渡等處附近村落布滿賊旗甯國守將劉松山督隊於八月初八日馳抵涇城與守涇之易開俊會商以章家渡距城較近必須先清此路而後可徐圖茂林初九日部勒各營侵曉卽發劉松山令章瑞璿率各旗從右路

進易開俊令陳名鈺喻先達率各旗從左路進仍自率陳青雲
王華國蕭章開繼之道出丁家渡斬守卡賊數人不數里枕山
依水賊館羅列我軍甫進各賊已紛紛縮入章家渡易開俊劉
松山等催軍猛擊斬馘頗多突有花旗一股自金村來援章家
渡敗賊亦復回戈轉鬪勢殊驚悍陳青雲率隊斜刺而入章合
才易德麟併力乘之王華國蕭章開等從叢箐中鈔出賊後賊
乃錯愕敗往水南都而去易開俊以該處去茂林尙十七里勢
難同日進剿謀之劉松山於十一日馳擊茂林至則鳳村李村
之賊聞風悉遁乃以六旗攻茂林四壘以二旗攻潘村三壘茂
林之賊踰橋來拒鄧光武雷國英急起乘之偏賊過橋退至村

口章合才率眾追之樟樹下一壘出千餘賊互爲之援適易德
麟騎隊橫出邀截之而章合才王華國等亦從村後鈔來賊隊
散亂不能歸壘壘中守賊亦靡然潰矣其攻中壘者爲歐陽廷
易致中仰攻逾時忽見古酋出巢督戰歐陽廷以一旗往來掠
陣易致中昇巨礮轟之古酋負創返奔易開俊亦自將勁隊馳
至火箭火球齊擲賊中立燔巨壘二座而潘村三壘亦爲陳青
雲張恆舟兩營所破於是合軍追逐又踰二壘於潘村之後餘
黨向太平老巢而遁此八月初九十一等日會剿涇縣之章家
渡及攻破茂林潘村等處七村九壘之情形也甯國北路曰水
陽曰馬山埠爲羣賊所嘯聚一聞劉松山赴涇甯郡空虛潛謀

襲我郡城十四日劉松山引軍馳回傳令各門繕修守具戒備以觀其變十七日諜報賊至油榨溝將以詰朝來襲劉松山令章瑞璿舒翰楊玉迪等夜出南門繞過敬亭山擇險設伏又令張聲壯易德麟等在西城嚴陣以待天甫向曙賊數千人沿河遙擁而至一悍目繞城大呼以令於眾我將士伏於女牆寂若無人注視良久見賊布勢漸寬號鼓一發爭拔鹿角踰濠競進劉松山令張聲壯等迎勦西門之賊並分擊街後一路陳世隆出勦南門之賊而自督胡文高章合才等突啟北門鼓譟而出賊不及備死於濠下者三四十人遂驅賊至北門街賊翻身猛撲抽刃巷戰賊正倉皇欲遁張聲壯易德麟等適從西門追賊

而來勢若奔濤遂將北門兩股一併擊退賊之在南門者聞信惶懼將望敬亭山折竄而北詎料我軍正設伏該處橫斷歸路賊乃東趨廟埠併股狂奔劉松山又遣章合才等遮擊於前陳世隆章瑞璿等緊躡於後伏尸盈路賊走陳卻灣濱河一帶爭舟舟覆蹙偏入水者無數劉松山又於二十二日率楊玉迪章合才等迎賊於廟埠不戰而退楊玉迪進軍油榨溝河奮擊忽爲飛子傷鼻血流交頤猶復單騎突陣賊不敢犯始相率循河下竄此八月十八日賊襲甯國府城力戰擊退之情形也維時涇縣之水南都尙有踞匪糾黨麇聚丁塘延及茶坑田坊四頁村其勢復張二十四夜易開俊密諭各營出奇兵以雕勦比曉

進圍四頁邨執先鋒賊數百斬之隨分二旗撲入茶坑二旗馳入田坊又破之會師轉向丁塘乘賊無備攀卡齊入短兵巷戰賊盡披靡一時潰出雲嶺越數日仍踰嶺而西竄至水南都旋踞平垣九月初三日易開俊軍次平垣五里許以蕭章開曹義勝擊中路以陳青雲王華國擊左右兩路賊競踰崖而逸初七日我軍搜勦晏公塘零匪未及交鋒遽與壩頭漕溪合股併退風坑易開俊卽於初八日出隊琴溪橋下設伏誘賊賊自風坑悉眾來撲曹義勝張恆舟接戰佯卻引入伏中歐陽廷陳青雲等突出包圍亂刃交錯賊不能支敗往甯國縣而去此八月下旬至九月初八等日涇縣分勦獲勝之情形也

臣查甯國涇縣

地居皖南數屬之中自上年張運蘭因病回湘易開俊劉松山等接統所部分駐兩城屢卻大敵復能馳驅援應往往日行百里實屬勞苦功多保全大局藍翎把總鄧光武藍翎外委雷國英均係力戰陣亡應請

敕部從優議卹所有官軍駐守甯國涇縣擊賊疊勝緣由謹繕摺由驛五百里具奏伏乞

皇太后

皇上聖鑒訓示謹

奏

金陵軍壘克八隘并復秣陵關摺

同治二年十月十二日

奏爲金陵陸師壘克東南沿河八隘并復秣陵關僞城恭摺馳
陳仰祈

聖鑒事竊本年八月間官軍攻克江東橋上方橋後金陵城東
尙有數隘未下夾河而壘戒備甚嚴近城者曰中和橋曰雙橋
門曰七甕橋稍遠者曰方山土山曰上方門高橋門迤南則爲
秣陵關以至於博望鎮亦金陵之外輔也曾國荃以東路未平
不能制城賊之死命遂令蕭慶衍彭毓橘蕭孚泗等擇小河紆
曲之處架橋結筏謀分隊伍東渡立營詎賊已先據河東築數
壘以拒我蕭慶衍壘用巨礮隔河迎擊旋於九月十八日派朱

吉玉李祥和更在西岸上下游各修三營爲進兵之計賊復列
洋槍數千枝於隄埂下與我軍盡力對轟相持不下者兩日夜
二十日四更時李祥和王仕益蕭開印吳次漢等率銳卒從下
游過河蕭慶衍率朱吉玉劉長槐等營從上游過河破五土壘
殲賊頗眾俄而城賊壘賊蠡擁來爭蕭慶衍一面搶築營寨一
面麾軍環進挫賊前鋒逾時卻走而東岸之營壘已成二十二
日賊又諸道并出銳不可當陳湜彭毓橘蕭孚泗會督趙二元
武交清駐兵其中使雙橋門以東不能通城賊之氣蕭慶衍更
率所部各營徑取中路戰入垓心曾輝曰王棲鳳蕭有致等死
之各將士憤甚相排競進賊乃靡然返竄蕭慶衍以騎隊邀斷

歸路遂克上方門高橋門雙橋門諸石壘而右路方山土山之賊經熊登武胡松江陳壽武等分道馳勦亦各棄壘而奔於是七甕橋踞賊惶遽欲遁蕭孚泗彭毓橘帶熊登武等八營扼定東岸之左李臣典帶吳宗國等五營遮擊西岸之前正謀前後合圍一鼓併下城中忽出大股抵死來援兩軍相搏張毓明劉開傳章盛南蔡典隆羅得升喻得輝等又死之蕭孚泗彭毓橘急督各軍擊退援賊仍復偪壘環攻至二十四夜令死士潛往縱火賊眾冒煙突出乃克斯壘屠戮無算此九月十七至二十四等日連克上方門高橋門雙橋門土山方山七甕橋二十餘壘之情形也方山以南爲秣陵關關以南則爲博望鎮賊在該

鎮設卡者一築壘者七上可以應水陽而旁可以控金桂關守
關者爲朱南桂亦曾國荃之部將也九月十八日聞鮑超等軍
將有事於水陽朱南桂卽會約朱洪章武明良等五營進次小
丹陽潛察形勢議襲博望鎮使不能爲水陽之援夜漏四下朱
南桂率黎冠湘等銜枚疾進以武明良爲右翼朱洪章等爲左
翼十九日昧爽各軍前鋒齊抵博望卡下卡賊負固死守槍礮
橫飛猝不得近朱洪章俟賊少懈昇巨礮至左卡一發而殲數
賊武明良又用火箭攢射燔及右卡哨棚羣賊駭懼撲火爭竄
我軍正乘勢殺入燬其堅卡而壘中之賊傾巢驟至朱南桂往
來猛撲未能略挫其鋒朱洪章武明良陰率哨勇繞出頭壘踰

牆而登賊聞後路人聲若沸返顧羣壘已易官軍旗幟錯愕不知所爲朱南桂等遂縱兵夾剿驅賊至長流背地方墮河而溺者強半乃引軍回駐博望奪獲米穀近二千石此九月十九日金柱關防軍攻破博望鎮二十七壘之情形也曾國荃以博望旣得則秣陵關之勢孤七甕橋旣得則中和橋之勢孤二十五日派趙三元伍維壽共帶馬步九營南略秣陵關又派陳湜黃潤昌分帶八營出七甕橋之西與熊登武胡松江等會師於中和橋一戰克之而秣陵關之賊見我馬步馳至卽棄釜奔潰各營追及河干深不可涉僅斬尾股二百餘人而還自是紫金山西南無一賊巢矣二十七日曾國荃親督蕭慶衍蕭孚泗彭毓

橋李臣典陳湜等往勘孝陵衛地勢將欲分營移駐賊自朝陽
太平兩門突出二枝前來搗戰蕭慶衍陳湜率所部各當一路
蕭孚泗李臣典率所部傍城鈔入鏖戰方酣俄有一酋指麾督
陣曾國荃知爲巨目乃匿洋槍隊於山麓伺其近而擊之該酋
中槍墜馬賊陣遽亂有敗往城中者有不及回城轉向淳化鎮
大路而逸者蕭慶衍陳湜等率騎兵追至三十里外俘執百數
十人訊據供稱中槍之酋僞護王陳坤書也章順二僞王仍退
入城殆不敢復出矣此二十五至二十七日疊克中和橋秣陵
關及大戰城下獲勝之情形也臣查金陵一城面面布置據有
重險爲洪逆堅不可拔之基自克九洑洲江東橋數隘而西南

一面已爲我有茲又克七甕橋秣陵關等隘而東南一面並爲
我有現今蕭慶衍全隊進紮孝陵衛經營城北漸成合圍之局
此次出力人員應俟續立功績彙案請獎其力戰陣亡人員俟
查明月行開單請卹所有金陵一軍疊克要隘緣由謹會同大
學士湖廣督臣官文江蘇撫臣李鴻章浙江撫臣曾國荃由驛
五百里具奏伏乞

皇太后

皇上聖鑒訓示謹

奏

古隆賢率眾投誠收復三縣摺

同治二年十月十二日

奏爲降人古隆賢舉眾就撫收復石埭太平旌德三城恭摺馳
陳仰祈

聖鑒事竊僞匡王賴文鴻竄踞太平一縣僞奉王古隆賢分踞
石埭旌德廣德等城聚黨出掠久貽皖南之患自賴文鴻爲涇
軍所敗遁入甯國縣而太平遂爲古隆賢分地本年八月下旬
青陽解圍後該城守將朱品隆疊據古隆賢遣人通款請以四
城獻部眾之在石太者四萬有奇其在旌廣者亦三萬有奇悉
願反正乞貸一死朱品隆察其窮餓歸誠情詞肫切知非挾詐
僞而來也卽呈明臣處議將廣德撫局以鮑超任之旌德撫局

以易開俊任之石埭太平撫局則請自任之九月十九至二十
三等曰朱品隆兩派營弁馳赴石埭宣諭降眾先繳軍械次令
薙髮分屯城下以待命二十八日親督易潤壇梅錦源等分帶
四營入城受降並調踞守太平之江老三二千餘眾歸併石埭
詳加簡閱挑留馬步千人編立營哨仍交古隆賢管帶責令立
功贖罪餘則由臣籌發萬金視原籍之遠近定給資之多寡概
予遣散是日旣復石埭縣城遂於次日飭喻志業前往太平併
復城池調喻吉三所部三營守之初江老三方以太平來獻僞
天將江會義率黨背盟殺古朝將以叛取道三溪竄往廣德二
十七日涇縣守將易開俊突由馬渡橋橫出截擊斬馘頗眾乃

引軍進次旌德城外守旌德者爲僞岷天義申法喜早已聞風
先遁餘黨盧旺有汪泯珊長跼道左舉城歸降易開俊安撫城
中盡遣降卒三千餘人卽分所部兩營守之據總兵朱品隆易
開俊歷將籌辦情形呈報前來臣查古隆賢爲賊巨擘本屬罪
不容誅一旦翻然悔悟自拔來歸不煩一兵而三城並下亦尙
有寸功足錄不邀寬典則無以開羣盜自新之路而廣
聖朝如天之仁合無籲懇

天恩准照上年洪容海投誠成案

賞給古隆賢游擊虛銜頂帶以昭激勸其部下頭目及經辦招
撫各將士可否容臣查明酌加獎勵之處出自

聖裁所有古隆賢率眾來降疊復三縣緣由謹繕摺由驛具奏
伏乞

皇太后

皇上聖鑒訓示再廣德一城臣飭鮑超部下宋國永往辦招撫
事宜旋有叛黨江會義申法喜等下竄尙恐事多中變現在水
陸各軍已克復東壩鮑超卽將由建平進剿廣德該州之或撫
或剿已檄令相機辦理續行具奏合併陳明謹

奏

近日軍情片

同治二年十月十二日

再近日軍情臨淮一路穩守如常富明阿於九月二十六日親赴蒙城督剿李世忠進軍姚家灣以圖下蔡直擣苗逆老巢唐訓方亦分軍大小蚌埠以圖懷遠聲勢頗爲聯絡潁州兵練攻破朱滑孜圩郡西漸靖陳大濟捻股亦經鄂軍擊敗由麻城境內竄歸河南無慮旁延皖境矣湖南道州有警孫長紱以江西南邊空虛咨調席寶田一軍赴潁州防守臣又令江忠義一軍回駐饒州境內江西設有緩急添此兩軍足資防禦大江兩岸甯國太平以東久爲賊藪彭玉麟親督水師會合王可陞吳坤修等陸師於九月杪攻克密灣金寶圩水陽新河莊塘溝滄溪

各賊壘駐師高瀆湖口高瀆守賊楊友清遣人乞降十月初二日收復高瀆縣城東壩賊黨黎立新等亦卽具稟納款願爲內應彭玉麟知東壩一股已無固志商同鮑超率師疾進楊岳斌亦帶師船來會旋於初七日攻克東壩留黎立新降眾三營餘則誅夷殆盡此次幸仗

天威得此東壩要隘不特皖南可冀肅清卽東至蘇州北至金陵攻取亦較有把握除水陸剿撫各情形另摺續報外合先附陳大概仰慰

宸廑伏乞

皇太后

皇上聖鑒謹
奏

克復水陽東壩等隘高瀆等四縣摺

同治二年十月二日

奏

爲水陸各軍剿撫兼施疊復水陽新河莊東壩等隘高瀆甯國建平溧水四城恭摺馳報仰祈

聖鑒事竊官軍攻克水陽新河莊並復高瀆東壩等城隘臣國

藩於十月十二日附陳大概在案方鮑超進軍仙人橋王可陞

進軍東門渡出金寶圩之南將并攻新河莊臣王麟以該處地

窄勢險未可以用眾也因率喻俊明唐敏義水師兩營並約吳

坤修劉祥勝傅家桂等陸師六營出金寶圩之北將有事於水

陽臣岳斌亦率李濟清羅宏裕王仁和等戰船來會師次審灣

見有堅大石壘礮眼層列能越水陽等壘而遙擊我軍九月二

十六日風雨蔽天賊備少懈喻俊明唐敏義乘夜運礮過河密排洲次徹夜環轟比曉石壘半圯遂合劉祥勝等鼓噪而前李濟清吳坤修亦駕小划入亮隄門平圩埂數壘併攻水陽破之其南路則有成發翔張錦芳等帶舳板進南湖毀夾岸兩卡卽於次日衝過新河莊從油榨溝倒擊而下時鮑超浮橋未成弗克東渡王可陞偏師獨進正與眾賊相持各水勇升岸大呼踰濠競入力攻新河莊又破之水陽迤北曰滄溪距滄溪十餘里曰塘溝爲直達高瀆之要路臣王麟於二十九日令吳坤修萬化林往取滄溪親督水師及傅家桂等陸師襲陷塘溝進塘溝數里曰高瀆湖口東西兩壘萬槍齊發阻我陸軍進步十月初

一曰唐敏義王仁利於槍子如雨之中會合各舟師疾駛而進拔其堅壘又數里曰長樂鎮街市之中賊築石城礮台旌旗迷目我軍略不停槳衝入湖心忽梗一橋洋槍集於橋下喻俊明羅宏裕李濟清傍兩岸悉力衝擊唐敏義王仁和爭拔樁木斫斷橋梁一躍而上舉火立燔石城該鎮旣克劉祥勝傳家桂亦渡旱隊來助吳坤修萬化林亦自滄溪戰勝而還乃合軍謀進高瀆先是高瀆賊目楊友清乞撫不許至是該賊目遣人通款伏地涕泣自陳臣王麟察其情詞可信令與僞輔王餘黨自相攻鬪始許之降初二日率師前往受降及至西門外煙燄上騰殺聲未絕楊友清率眾扣馬告曰僞輔王府餘孽有變頃已計

斬之矣於是入城安撫悉遣降眾是夜略地而東並取固城一
鎮此九月二十七至十月初一日水陸連破七隘初二日收復
高淳縣城之情形也自太平旌德背盟叛去之江申二酋下竄
東安鎮圖與僞匡王賴文鴻合股易開俊以旌城初復賊未遠
颺利在速戰而又慮廣德撫議未成仍爲該二酋挾之以叛也
乃遣降人彭國鈞聞道入廣德馳諭招之一面部勒營伍於初
三日度環雲嶺將抵東安鎮市口賊館如雲散布村落聞歐陽
廷易致中步隊及蕭章開騎隊騰蹕而入所遇輒殪隔岸賊援
涉水來爭又得陳裕英等渡河鈔擊陳名鉅等沿河兜剿賊受
大創隕然而潰維時甯郡守將劉松山方揚隊於白菓樹湯村

何村一帶訶知株木店增賊四五千眾悉自東安鎮戰敗而來
乃引軍突出截之賊正傳餐將發不虞我兵猝至悉無鬪志棄
金駭奔劉松山親督各勇驅出廣德大路旋即移師東嚮將攻
甯國縣城賊賴文鴻先經聞風宵遁而易開俊所派之陳裕英
等旗適至遂與劉松山會復城池初四日彭國鈞返自廣德引
降將鄭魁武部眾萬餘人詣東安鎮軍前乞降易開俊曉以大
義簡留一營餘則概予資遣惟鄭魁武舉眾來歸廣德一城又
爲江會義申法喜叛黨乘虛竊據矣此十月初三日收復甯國
縣城之情形也初新河莊旣克尙有東夏四壘爲建平東壩之
樞紐初八日鮑超令馮標周有勝王衍慶等屯軍曹塘進攻東

夏賊恃牆濶濠深堅伏不出馮標摩壘而進手刃悍酋周有勝
王衍慶率眾爭抽鹿角齊登一壘平而眾壘俱下自是東壩守
賊黎立新等上書水營請爲內應建平守賊張勝祿等上書陸
營請獻城池定議建平撫事使馮標任之東壩之戰事則鮑超
與臣玉麟同任之初七日臣玉麟率水師八營及吳坤修劉祥
勝等旱勇六營鮑超亦率馬步十三營合趨東壩見上壩高峙
三大壘壩後築有僞城橫亘數里正議分軍立寨僞隨王楊柳
谷馳告壘賊梗命楊輔清爲謀主乞速進兵以踐黎立新之約
鮑超卽令譚勝達李文益熊鐵生黃海清孫得友等繞壘圍攻
臣玉麟亦令喻俊明唐敏義等五營依護吳坤修劉祥勝各隊

直出壘下適臣岳斌飛槩而來督令李濟清王仁和羅宏裕等專向水路助陣戰不逾時殲賊盈千賊多踰壘而逸者楊輔清從亂軍中敗往溧陽而楊柳谷立獻僞城乃克東壩要隘東壩復而建平之捷書亦至自馮標入境宣諭張勝祿等十二人感激涕零矢志不貳卽於是日斬僞跟王藍仁得舉城以降建平復而溧水之降書又至踞溧水者爲楊英清黨衆萬餘願繳軍械各散回籍十二日臣王麟會同臣岳斌帶隊進城溫詞撫慰盡資之行不復稍留降衆另立新營此十月初七至十二等日剿撫兼施克復建平溧水二縣及東壩一隘之情形也伏查江皖接壤之區以東壩爲最要關鍵仰賴

天威震疊驚服羣酋旬日之間收取四城并奪東壩重險臣國
藩現檄鮑超全軍駐守東壩保此三省扼要之地卽爲附近游
擊之師檄派王可陞守溧水李榕守建平洪容海守高淳朱品
隆喻吉三兩軍分守青陽石埭太平三城易開俊劉松山兩軍
分守甯郡旌德涇縣三城此外無兵可撥以故廣德一州未能
進勦甯國一縣未能置守致皖南不能一律肅清愧歉實深諸
賊目革面自新有裨全局似宜宥其罪而并錄其功合無籲懇
聖恩准將楊柳谷鄭魁武張勝祿等三人

賞給都司盧銜頂帶楊仁義黃儒繡李明魁黃勇發江元泰陳
永爵董明玉湯桂風陳世青周珍金汪保發等十一人

賞給守備虛銜頂帶以昭激勵其餘大小頭目可否酌給虛銜
此次在事出力人員可否容臣等查明併案保獎之處出自
鴻施逾格至陣亡各員弁均俟一併確查彙案請卹所有官軍
勦撫並籌疊復各城隘緣由謹繕摺由驛五百里具奏伏乞
皇太后

皇上聖鑒訓示謹

奏

欽奉 諭旨覆陳四條摺 同治二年十二月十二日

奏爲欽奉疊次

諭旨恭摺覆陳仰祈

聖鑒事竊自本年入冬以來苗黨就誅蘇垣克復東南軍事大有起色惟劇寇未除反側難安可慮之處尙多屢蒙

詰誥誠精詳指示機要計十一月十一至二十二等日奉

旨飭查及垂詢各事宜謹一一分晰條列詳對如左

一恭奉十一月十一日

諭旨壽州收復之後李世忠所部進城擅殺守門勇丁五名又於圍攻下蔡時因宋慶不肯讓給調隊攻打爭功起釁寔屬不

成事體飭將啟釁根由秉公查辦一節臣查陳國瑞與李世忠
構衅彼此各執一詞據陳國瑞稟稱派副將康錦文帶同苗景
開等於初一日攻克壽州初三日有李世忠營將領進城卽殺
守門勇丁五名康錦文整隊迎敵立將李營隊伍逐出城外生
擒五十餘名內有已保提督之蔣立功一名等語據李世忠呈
稱派朱元興等前往收復壽州不料被苗景開將記名提督朱
元興杜宜魁二員同時殺斃尸在壽州月城之內又派蔣立功
前往收復正陽行過壽州被人誘入城內宋慶康錦文將提督
蔣立功鎖押等語僧格林沁初次具奏稱李世忠所部擅殺守
門勇丁其時但據陳國瑞之稟尙未接李世忠之稟厥後接到

李世忠稟件知陳國瑞部下宋康二將有鎖押蔣立功之案其所帶之苗景開又有殺斃朱元興杜宜魁之案情節尤重價格林沁寄臣一函謂兩造各執一詞已咨唐訓方查辦矣唐訓方旋亦寄臣一函謂朱元興杜宜魁與宋慶康錦文先後同入壽城彼此互爭互有殺傷今李世忠咨稱朱杜死於苗景開之手應卽殺苗景開以議抵先了此案等語以臣愚見觀之苗景開本係苗沛霖親屬死黨卽無殺朱杜二人應抵之案亦在萬不可赦之列宋慶雖稟訴蔣立功擅殺門卒然互爭之時殺傷實亦相當又於李世忠部下之提鎮擊斃二人鎖押一人當不至更有餘怒李世忠不敢歸咎宋慶等而指名係苗景開所殺又

恐其部下滋事急急帶隊回滁是尙無尋仇生衅之意若果殺苗景開以慰之必且感而兼畏不至更有後言此案由唐訓方悉心查明僧格林沁就近判斷自可處置妥善兩得其平至下蔡之役係李世忠部將何璜先入苗眾雖降而尙未獻寨逮宋慶康錦文挾苗景開而來賊始舉寨以獻當時互爭鬪殺在所不免何璜旋卽退至龍王廟尙無始終爭執情事謹就微臣所聞覆陳梗概其詳細情形應由僧格林沁唐訓方查明擬結

一恭奉十一月二十二日

諭旨垂詢正陽收復之時道員蔣凝學何以有爭奪開礮致傷兵勇之事飭令查明據實奏聞一節查正陽關城本係毛有銘

會同康錦文程文炳於十一月初四日前往收復維時蔣凝學成大吉兩軍尙在潁上未知朱萬隆先已獻關投誠初六日移師至正陽隔河立營正擬搭造浮橋而關上陸軍河下礮划已羣起轟擊蔣凝學等但知朱萬隆尙在城內以爲苗黨之出拒官軍也不得不開礮還擊蓋康錦文自壽州而往在正陽之東毛有銘自六安而往在正陽之西南蔣凝學自潁上而往在正陽之西北三者各不相謀當彼此互擊之時不特康錦文官兵在關城之內蔣凝學不得而知卽毛有銘湘軍在關城之旁蔣凝學亦不得而知也旋經毛有銘飛騎馳告彼此各自收隊究竟浮橋未成並無一人渡河蔣凝學所稟傷亡六十餘人康錦

文所稟傷亡二十餘人臣竊以爲皆不可信頃據唐訓方來咨有親赴正陽細加訪察實因雨下未及知會並非有心尋衅等語揆厥情形尙屬可信唐訓方業經咨呈僧格林沁免其查辦臣卽日亦當具咨詳述一切

一恭奉十一月十五日

諭旨鮑超全軍現紮東壩此時溧水已復自應進圖句容以斷忠逆救援金陵之路一節查溧水迤北爲句容而迤東則爲溧陽該處去東壩較近實僞侍王李世賢之老巢十一月十二日侍逆糾黨五六萬眾分屯梅渚距東壩建平各四十餘里十四日進犯建平守城將士一戰卻之又轉趨周城社渚一帶於二

十五日猛撲溧水守將王可陞徹夜登陴力戰卻之近據謀報忠逆由金陵退入句容旋由句容潛入溧陽與侍逆合股意在分擾溧水建平奪我東壩一關併圖上竄東壩爲江皖浙三省關鍵鮑超正須以全力爭此要區暫不能進取句容以合金陵之圍自句容而外論者又謂宜急取廣德肅清全皖扼賊上犯之路臣以廣德易取而不易守鮑超旣力扼東壩更無他軍可當廣德一路句容廣德之不能早爭先著臣之力薄而心彌歉耳

一恭奉十一月二十二日

諭旨壽潁各城均已收復現祇勦辦零星股匪可以無須大兵

屯聚張得勝蔣凝學成大吉諸軍均可移緩就急分撥赴陝一
節查湘營之在皖北者有四一曰蔣凝學駐軍潁州及三劉集
進取潁上縣城者也一曰毛有銘駐軍老廟集會復正陽一關
者也一曰周寬世駐軍六安州分防迎河集者也一曰成大吉
駐軍三河尖與蔣凝學同進潁上者也此外又有石清吉一軍
駐防廬州係多隆阿舊部亦歸臣處調遣臣以皖北苗黨就滅
羣圩悉平而忠逆又有上竄江西之議皖南別無大枝游擊之
師乃檄毛有銘所部移駐皖南並調周寬世回守省城而換出
安慶防兵與毛有銘同赴南岸爲江皖交界游擊之師其成大
吉一軍已准官文來咨調赴鄂省防剿二關一帶石清吉一軍

亦赴鄂省防剿小河司一帶將來此二軍者或久留湖北或漸入陝西應由官文酌度辦理臣所轄皖北之兵除調出四軍外僅留蔣凝學數營分防潁州六安等處暫時未可輕動以上四條均係近日奉

旨查詢之件理合逐款條對由驛五百里馳奏伏乞

皇太后

皇上聖鑒訓示謹

奏

恭謝

天恩並陳近日軍情摺同治二年十二月二十七

奏爲恭謝

天恩並陳近日軍情仰祈

聖鑒事竊

臣接准江蘇撫臣咨開李鴻章奏克復蘇州一摺同

治二年十一月初四日內閣奉

上諭協辦大學士兩江總督曾國藩遣將助兵克復名城著交
部從優議敘等因欽此當卽恭設香案望

闕叩頭謝

恩訖伏念

臣

忝督兩江才識短淺庚申辛酉兩年方以經營皖

事愧不能調將分兵早達蘇境以慰吳人雲霓之望而紓

朝廷宵旰之憂逮壬戌年疏薦李鴻章率師赴滬又愧不能多
撥得力之營同履危險之地維時所遣之將陸軍僅程學啟一
人係曾國荃拔諸降眾之中信其謀勇寡儔水軍僅黃翼升一
人係臣奏統舟師之員信其忠誠可恃此外如潘鼎新劉銘傳
張樹聲吳長慶張遇春等皆臣與李鴻章商同遴派之將自李
鴻章抵滬以後臣卽未續撥一將續助一兵今夏派李朝斌太
湖水師東下滬中之局已大定威已大振矣蘇州功績之成乃
由李鴻章秉承

聖謨獨攄忠愍每當艱險之際恆匹馬以當先或遇絕續之交
持孤注以爭勝用能轉危而爲安遠攻而近守臣自愧謀略之

不如亦並爲始願所不及更復何功可言何勞可錄不圖
聖澤旁敷優加甄敘聞

命之下感悚交併縱愚忱之勉竭覺報稱之彌難自蘇州克復
僞忠王卽帶數萬人援救金陵到城已近五十日尙未猛撲官
軍營壘近據李鴻章來函聞忠逆以溧陽至饒景數百里處處
乏食頗以裹糧急趨爲難又據鮑超來牘探報侍逆將親率悍
黨裹二十日糧蓄意由長興廣德甯國一帶上犯江西先據產
糧之區以俟忠逆續至各等語臣竊計忠侍二逆旣不能各保
分地又不欲苦援金陵誠非自皖入江別無圖存之策從廣德
甯邑上竄江西約有兩路西路由旌德太平石埭以竄饒景東

路由昌化瀘安開化以竄玉山西路之防臣已派兵堅守涇旌
太石青池六城東路之防必由浙境經過臣已飛咨左宗棠沈
葆楨分別扼守以期節節堵遏力保上游完區其金陵洪逆老
巢賊氣尙固糧食未竭臣第曾國荃日夜憂灼臣囑令不求速
效但求穩慎以期仰副

聖主靡念南疆謀出萬全之至意所有微臣感激下忱並近曰
軍情謹繕摺由驛具奏伏乞

皇太后

皇上聖鑒謹

奏